



PUO EA LETONA LA THUTO LE KOETLISO

MOHLOMPHEHI NTLHOI MOTSAMAI MP

LEKALENG LA THUTO LE KOETLISO

MINISTERIAL BOARDROOM

LA 13 PHEREKHONG 2021

Ho koaloa ha likolo le ho emisoa ha lihlahlobo – JC (Junior Certificate, LGCSE (Lesotho General Certificate of Secondary

Education) le Likolo tsa Mesebetsi oa Matsoho le tsa Thuto e Phahameng

Sechaba sa heso, joalo ka ha le utloile, Mohlomphehi Tona Kholo o phatlalalitse boemo ba tšoaetso ea covid 19 bo behileng naha 'maleng o mofubelu. Boemo bona bo tlama Lekala la heso ho fetola litaba tsa tšebetso likolong.

Ke tla qala ka ho hlokomelisa sechaba hore baithuti ba JC le ba LGCSE ba ne ba lokela ho ngola lihlahlobo tsa mapomelo ho qala ka khoeli ea Pherekhong ho fihlela ka khoeli ea Tlhakubele selemong se holimo sa 2021. Boemo bona bo nyarosang ba tšoaetso ea covid-19 bo re tlama bohle ho emisa litšebeletso joalokaha Mohlomphehi Tona Kholo a laetse.

Liphetho tse latelang li tlo etsahala nakong ena ea ho khinoa ha litšebeletso le metsamao ea libeke tse peli:

Ntlha ea pele (1): Lihlahlobo tsa JC

Baithuti ba qalile lihlahlobo tsa lithuto tse etsoang ka matsoho(practicals) ho tloha ka la 5 Pherekhong 'me tsona li ne li lebelletsoe ho fella ka la 16 Pherekhong. Ka hona li kenella ka hara nako ena ea khefutso.

Lihlahlobo tse amehang ke tsa lithuto tse latelang:

- Integrated Home-Economics (moroko le mopheho):
 - Baithuti ba qalile ho pheha ka la 5 Pherekhong ba arotsoe ka lihlopha le matsatsi likolong tse nang le baithuti ba bangata haholo. Setsi sa Lihlahlobo (ECOL) se tla etsa litokiso tsa hore baithuti ba basa qetang ba fumantšoe monyetla oa ho qetela lihlahlobo tsena tsa bona nakong e tlang.
- Computer Education, Agriculture, Basic Handcrafts le Woodwork:
 - Baithuti ba ne ba lokela ho qala ka la 29 Pherekhong empa ka lebaka la khefutso ena, Setsi sa Lihlahlobo (ECOL) se tla etsa litokiso tsa hore ba tle ba tsoele pele ka mor'a nako ena ea khefutso (lockdown).

Lekala le ipiletsa ho litichere tse rutang thuto ea temo (Agriculture) ho etsa litlhophiso tsa ho hlokomela lihlahlobo tsa baithuti tse kenyelletsang lirapa, nakong ena ea libeke tse peli.

Ntlha ea bobeli (2): Lihlahlobo tsa LGCSE

Lihlahlobo tse amehang nakong ena ea khefutso ke tsa lithuto tse latelang:

- Food and Nutrition:
 - Hlahlobo e ne e lokela ho ngoloa ka la 18 Pherekhong. Ka mokhoa o tšoanang, le eona e tla lokisetsoa ke Setsi sa Lihlahlobo (ECOL) hore e tle e ngoloe ha morao. ECOL e entse phatlalatso ka la 12 Pherekhong ho botsamaisi ba likolo ho se reke lisebelisoa, e le ho thibela litšenyehelo tse sa hlokahaleng.

Boemong bona Lekala la Thuto le Koetliso le eletsa baithuti ho tsoelapele ho itokisetsoa ho ngola lihlahlobo tsa JC le LGCSE. Batsoali le bahlokomeli le bona ba tšehetse bana hore ba 'ne ba itokisetse lihlahlobo. Baithuti le bona ba 'ne ba qetele artefacts tse matsohong a bona. Lekala le khothaletsa litichere ho etsa matsapa a ho thusa bana ka malebela a lihlahlobo nakong ena e thata.

Ntumelleng sechaba sa heso ke kene litabeng tsa likolo tsa koetliso ea mesebetsi ea matsoho le tsa thuto e phahameng.

Likolo tsena joaloka likolo tsohle li koetsoe, 'me tsa thuto e phahameng li tla tsoelapele ka tšebeliso ea marang-rang

bakeng sa lithuto le lihlahlobo joalo kaha ho ile ha etsahala selemong se fetileng. Leha ho le joalo, re eleletsoe hore likolo tse ling li na le liqholotso tsa tšebeliso ea marang-rang, 'me hona ho bolela hore li lokela ho ntlafatsa mokhoa oa tsona oa marang-rang hobane hoa bonahala hore e se ele o tla sebetsa ho ea ho ile.

Ho latela maemo a renang, lithuto tse nang le se lokelang ho etsoa ka matsoho (practicals) likolong tsa thuto e phahameng le tsa mesebetsi ea matsoho li tla lokisetsa hore karolo ena ea bohlokoa boithutong ba baithuti e 'ne e phethahatsoe.

Ke qetelle ka ho ipeiletsa ho bohle ba sebetsang lekaleng la thuto ho kenyeletsa le ba kahar'a likolo ho sebetsa ka thata hang ha ho khutleloa mesebetsing ele ho koala sekheo sa nako e senyehileng ea lithuto.

Re kopa Molimo O matla o'hle ho sireletsa Lesotho le Basotho khahlanong le tšoetso ea Covid 19. Ba seng ba tšoaletsoe re ba lakaletsa ho fola kapele. Ba lahlehetsoeng ke beng ka bona re ba beha merapelong

KEA LEBOHA.

Khotso! Pula! Nala!